

ULLOQ 30.September 2023

UKA2023/30

Uunga siunnersuut: Meeqqanut suli atualingitsunut perorsaanikkut

inerikkiartuutaasunik ulluunerani neqeroorutit pillugit Inatsisartut Inatsisaat

Siunnersuuteqartoq: Meeqqanut, Inuusuttunut Ilaqutariinnullu Naalakkersuisoq

Siumuminngaanniit Naalakkersuisup meeqqanut suli atualingitsunut ulluunerani neqeroorutit pillugit inatsisissatut siunnersuutaanut qujavugut.

Inatsisit allannguutigineqartut inatsisinillu ilaterineq pitsaasutut isigivarput, taamaakkaluartorlu alloriarnerit ilaattut Siumumiit isigivarput.

Meeqqat inunngornerinninngaanniit nammineersinnaalernissaata tungaannut pitsaasunik sinaakkusiineq pingaarnerpaarpaat ilagivaat. Taamaammallu una saqqummiunneqartoq imarisamigut pitsaalluinnartunik siunertaqarpoq, naqqiissutit, oqaasertaliussat siunnerfiillu meeqqamut ataatsimut pitsaasumik anguniagaqarmata.

Sualuppoq siunnersuutip meeqqat immikkut pisariaqartitsisut kikkuuneri tikkuarmagit ilalerparput, uanimi innarluutillit kisiisa pinnagit kisiannili aamma meeqqat angerlarsimaffimmi atugarliortut ilangummagit.

Saniatigut meeqqat meeqqerivinnit atuarfimmumut ikaarsaariarnissaannut allattugaatigineqalernissaat pissusissamisoortutut isigivarput, tamannami amigaatigineqartarsimaqimmat, taamaalilluni meeraq ilakkarsarnissaminut pisariaqartitaminullu atuarrfimmi atualeruni sumiiffimmini inissaminiitsinneqassammat, atuarfiullu aatsaat takornartarinagu aallartinneraniit atuartuunissaanut piareersalereersinnaalissammagu.

Siunnersuut immiini kusanarluinnartoq pingaaruteqaqisorlu Siumumiit ilalerparput, taamaakkaluartorli sullissisussanut atugassarititaasut suli ukkatarineqarnerulernissaat piumasaaqatigerusupparput, taakkuummata uani siunnersuummi qitiulluinnartut. Taakkoqangippammi siunnersuut immiini isumaqassanngimmat. Massakkut inulerisunik, meeqqerivinni, utoqqarni, meeqqat angerlarsimaffiini atuareernerullu kingunerani ornittakkani amigaateqartutut inissisimasarpugut, naak Perorsaanermi Ilinniarfimmi naammassisartut ullumikkut naammattut pigigaluarlutigit. Ulluinnarni meeqqerisunut, nammataqartuurtunut qujarusuppugut, nasaarfigivassi. Imaannaanngilarmi suliarsi, imaannaasarsimanaviangilaq ilaanni sulisussaaruutipajarlusi pisarsimagussi, meeqqerivinni sulisut tamassi, eqqiaasuugussi,

igaffimmiikkussi, ikiortaagussi ilinniarsimanasiluunniit meeqqerisutut sulisuugussi, qujanarujussuaq.

Inatsimmi allaqqareersoq suli siunnersuummi atuuttoq, tassa ilisimatussutsikkut suli atualerneqanngitsunik ilisimatusarneq sukumiinerusumik nunatsinni attattariaqaripput isumaqarpugut. Siunnersuummimi toqqaannaq allaqqanngilaq nunatsinni perorsaannermi ilisimatusarneq sukumiinerusumik inissinneqassasoq. Imatut paasillugu, piareersarneqassasoq.

Siunissaq eqqarsaatigalugu inulerisunngorniarfinni perorsaannermik ilisimatusarfeqalernissaq Siumumiit eqqarsaatigeqqunarpoq. Massakkumut ilinniarfeqarfinni professions bachelorinngortoqartarpoq, Perorsaasuni Ilinniarfissuarmilu ilinniartuni. Ilaatigut almen pædagogik kandidatinnngorniarfigineqartarpoq, ukiulli tamaasa neqeroorutit allanngorartarput inunnullu ataasiakkaanuinnaq samminnituusarlutik. Sulili ersittumik nunatsinni taakku ilinniagaqalereersimasut ersittumik malunniuteqangaanngillat. Taamaammat nunatsinni inuusaaserput, perorsaariuserput, inuttut isiginnittaaserput, meeqqanut isiginnittaaserput, ilikkartitsisarnerput, kultuuritsinnut tunngasunut ilikkartitseriuserput oqaluttuarisaanermilu perorsaariutsitta allanngoriartorsimaneranik ilisimatusarnerit amigaatigivagut. Tamakku pingaarluinnarput perorsaariutsitta pitsaasumik inissisimalernissaanut, kisianni aamma inuiaqatigiittut pitsaasumik inissisimalernissatsinnut, sualuppoq perorsaasunik isiginnittaasitsinnut.

Meeqqerivinni sulisunut isiginninnerput pitsaasumik saatsinngikkutsigu, pitsaasunik atugassaqartilerlugit, uani pivakka akissarsiatigut, kusanartunik sinaakkusersuigaluaruttaluunniit nikingaarnavianninnatta.

Taamatut oqaaseqarlunga siunnersuut Kultooreqarnermut, ilinniartitaanermut, ilisimatusarnermut ilageeqarnermullu ataatsimiitsitaliamut ingerlateqqittussanngortippara.

Oqaaseqartoq, Najaaraq Møller Siumut